



Redaksioneel

Dit is vir die redaksie weereens 'n voorreg om hierdie uitgawe aan te bied. C. Nunes en H.J.M. van Deventer bied 'n standpunt ter ooreweging aan vir feministiese interpretasie in 'n reformatoriese konteks. In die artikel word gelet op die werk van bekende feministiese teoloë soos Schüssler-Fiorenza en Trible. Hierdie bydraes word in verband gebring met die Suid-Afrikaanse situasie oor die rol van die vrou in die kerk. Dan gee H.M. Zwemstra 'n beoordeling van die vernaamste kerklike en teologiese tradisies se bydrae tot die etiek van sosio-ekonomiese regte. Hierdie artikel is ook baie aktueel in die Suid-Afrikaanse konteks waar daar steeds gedebatteer word oor die wenslikheid en moontlikheid van die volle implementering van sosio-ekonomiese regte.

J.W. Gericke gee aandag aan die gebruik van kontekstomieë as regverdiging vir waarheidsaansprake in die verhouding tussen Ou en Nuwe Testament. Die outeur hoop om daarmee 'n bydrae te lewer tot die huidige bespreking van die onderwerp. Hy stel voor dat, gegewe die magdom onversoembare filosofiese teorieë oor die aard van waarheid, dit dalk nodig mag wees om meer genuanseerd met die waarheidsbegrip om te gaan. Hierdie artikel sal besinning oproep, nie net in die Bybelwetenskappe nie, maar ook in die sistematiese teologie. P. Verster bespreek die Skrifberoep in sending en veral die vraag of in die proses van evangelisering nog na begrippe soos *sonde*, *hemel*, *hel* en *verlossing* verwys kan word. Na behandeling van verskeie standpunte kom hy tot die gevolgtrekking dat hierdie begrippe steeds erken moet word, maar dat dit op die regte eksegetiese en hermeneutiese wyse bevestig moet word.

Twee artikels fokus op die belangrike saak van die prediking. I.A. Nell spits toe op preekvernuwing vanuit Bybelse en gereformeerde wortels. Hy gebruik die metafoer van gasvryheid om 'n saak daarvoor uit te maak dat prediking 'n venster moet wees waardeur nuwe vergesigte oor God en sy wêreld oopgesluit behoort te word in plaas daarvan dat dit 'n spieël is van die wêreldgebeure om ons. Dan behandel J.L. Helberg die bron van lewensvreugde volgens Psalm 1. Hy ondersoek die verhouding van Psalm 1 tot die res van die Psalms, tot die hele Ou Testament en tot die Nuwe Testament.

A.H. Snyman behandel “oorreding” in 1 Korintiërs 3:9c-23. Vanuit ’n nuwe perspektief, wat anders is as dié wat antieke retoriese kategorieë op die brief afdwing, toon hy aan hoe Paulus sy retoriese doelwitte in hierdie Skrifgedeelte bereik. Ook binne die Nuwe-Testamentiese wetenskap behandel G.J. van Wyk en F.P. Viljoen verskillende benaderings tot die interpretasie van die wonderverhale in Markus 8-10. Hulle kom tot die konklusie dat hierdie benaderings aantoon dat die koninkryk van God, ’n paradoksale Christologie sowel as dissipelskap ’n belangrike plek in die wonderwerke van die Markus-evangelie inneem.

Hierdie artikels bied goeie leesstof en behoort tot nadenke te stem. Lesers wat graag op wetenskaplik-akademiese wyse daarop wil reageer, is welkom om dit by wyse van diskussie-artikels te doen.

Verskeie resensies van onlangs gepubliseerde boeke word ook in hierdie uitgawe geresenseer.

J.M. Vorster

Redakteur: *In die Skriflig*